

MINISTARSTVO UNUTRAŠNJIH POSLOVA

389.

Na osnovu člana 84. stav 2. tačka c) Zakona o unutrašnjim poslovima Zeničko-dobojskog kantona („Službene novine Zeničko-dobojskog kantona broj 13/18), ministar unutrašnjih poslova Zeničko-dobojskog kantona, na prijedlog policijskog komesara, donosi

PRAVILNIK O NAČINU OBAVJEŠTAVANJA JAVNOSTI O RADU MINISTARSTVA UNUTRAŠNJIH POSLOVA ZENIČKO-DOBOJSKOG KANTONA I UPRAVE POLICIJE

Član 1. (Opšte odredbe)

Ovim Pravilnikom uređuje se način obavještanja javnosti o radu Ministarstva unutrašnjih poslova Zeničko-dobojskog kantona (u daljem tekstu Ministarstvo) i Uprave policije, način davanja informacija medijima, te ostala pitanja od važnosti za komuniciranje s javnošću.

Član 2. (Svrha Pravilnika)

Svrha Pravilnika je uspostavljanje odnosa s medijima u cilju predstavljanja rada i aktivnosti Ministarstva i Uprave policije u skladu sa načelima stručnosti, neovisnosti, nepristranosti, objektivnosti i pouzdanosti, postizanja boljeg razumijevanja službenih statistika te određivanje načina reagiranja u slučajevima neobjektivnog predstavljanja, neosnovane kritike, pogrešnog tumačenja i zloupotrebe podataka.

Član 3. (Mediji)

Pod medijima se, u smislu ovog Pravilnika, podrazumijevaju novine i druga štampa, internet-portali, radijske i televizijske stanice, novinske agencije, elektronske publikacije, teletext i ostali oblici dnevnog ili periodičnog izvještavanja.

Član 4. (Tačnost i pravovremenost informacija)

(1) Ministarstvo i Uprava policije dužni su medijima davati tačne, pouzdane, potpune i pravovremene informacije o pitanjima iz svoje nadležnosti.

(2) Informacije o pitanjima iz nadležnosti Ministarstva i Uprave policije moraju biti dostupne svim medijima pod jednakim uslovima.

Član 5. (Ravnopravnost spolova)

Gramatička terminologija Pravilnika podrazumjeva ravnopravno uključivanje oba spola.

Član 6. (Odnosi s javnošću)

- (1) Poslove vezane za odnose s javnošću obavljaju službenici za odnose s javnošću u Kabinetu ministra i Uredu policijskog komesara.
- (2) Podaci o službenicima i organizacionim jedinicama zaduženim za odnose s javnošću objavljuju se na službenoj web stranici Ministarstva.

Član 7. (Službenici za odnose s javnošću)

- (1) Službenici za odnose s javnošću dužni su medijima i svim drugim zainteresovanim subjektima osigurati pravovremeno i objektivno informisanje.
- (2) Službenici za odnose s javnošću ostvaruju komunikaciju s medijima vezano za pitanja iz nadležnosti Ministarstva i Uprave policije, saradnju sa službenicima ili organizacionim jedinicama koje obavljaju iste ili slične poslove u institucijama i tijelima vlasti, domaćim i međunarodnim institucijama i organizacijama.
- (3) Službenici za odnose s javnošću staraju se o ažurnosti web stranice Ministarstva, učestvuju u edukaciji zaposlenih o odnosima s javnošću, te učestvuju u aktivnostima koje imaju za cilj približavanje građana policiji.

Član 8. (Odgovor službenika za odnose s javnošću)

Nakon zaprimanja zahtjeva za određenom informacijom, službenik za odnose s javnošću priprema odgovor, u dogovoru sa rukovodiocima organizacionih jedinica nadležnih za pitanja na koja se zahtjev odnosi.

Član 9. (Zakon o slobodi pristupa informacijama u BiH)

Ukoliko se upiti odnose na Zakon o slobodi pristupa informacijama u Bosni i Hercegovini primjenjuju se norme propisane ovim Zakonom i podzakonskim aktima iz nadležnosti ovog Ministarstva donesenim na osnovu ovog Zakona.

Član 10.

(Javna istupanja ministra i policijskog komesara)

- (1) Ministar i policijski komesar javno predstavljaju rezultate rada i daju informacije o radu i aktivnostima Ministarstva i Uprave policije.
- (2) Ministar odnosno policijski komesar imaju pravo ovlastiti službenika koji ne radi na poslovima odnosa s javnošću da javno istupi u pogledu davanja određenih informacija u nekom predmetu ili istraži kao i u cilju predstavljanja rezultata i davanja drugih informacija o aktivnostima Ministarstva i Uprave policije.
- (3) Nakon izjava za medije iz stava (2) ovog člana, službenik koji je dao izjavu obaviještava nadležnog službenika za odnose s javnošću o prirodi i sadržaju svoje izjave za medije.

Član 11.

(Svakodnevni kontakti sa medijima)

- (1) Službenici za odnose s javnošću daju izjave za medije u vezi sa svim pitanjima iz nadležnosti Ministarstva odnosno Uprave policije.
- (2) Odgovore na pitanja vezana za javni red i mir i sigurnost u saobraćaju ovlašteni su da daju, pored službenika za odnose s javnošću, načelnik Sektora uniformisane policije, načelnici policijskih uprava i komandiri policijskih stanica te rukodilac smjene u Operativnom centru Uprave policije uz prethodnu saglasnost policijskog komesara.
- (3) Odgovore na pitanja vezana za kriminalitet ovlašteni su da daju, pored službenika za odnose s javnošću, načelnik Sektora kriminalističke policije, načelnici policijskih uprava te komandiri policijskih stanica, uz prethodnu saglasnost policijskog komesara.
- (4) Policijski službenici, državni službenici i namještenici Ministarstva i Uprave policije ne mogu davati izjave niti na drugi način javno komentarisati rad Ministarstva i Uprave policije bez odobrenja ministra odnosno policijskog komesara.

Član 12.

(Postupanje u specijalnim operacijama i akcijama)

Službenici za odnose s javnošću javno istupaju u slučajevima izuzetnih događaja i specijalnih operacija i akcija, kada je od izuzetne važnosti da se javnost blagovremeno i korektno informiše, posebno u slučajevima kada je javnost uznemirena zbog nekog događaja (teška krivična djela, složene akcije hapšenja,

potjera za opasnim bjeguncem i slično), te da se umanjí uznemirenost građana i vrati povjerenje u policiju.

Član 13.

(Odnosi sa novinarima na mjestu policijskog uviđaja)

- (1) Ukoliko je krivično djelo izvršeno na mjestu otvorenom za javnost, novinari imaju pravo biti prisutni ali ne smiju ometati istragu policije ili se miješati u rad sa dokazima ili svjedocima.
- (2) Policijski službenici koji vode istragu mogu kratko odgovarati na postavljena pitanja pri čemu se povjerljive informacije, važne za daljnji tok policijskog rada, ne smiju otkrivati.
- (3) Činjenice vezane za situaciju mogu se prenijeti novinarima bez davanja komentara o slučaju.
- (4) Predstavnici medija, izvršavajući svoje radne zadatke, ne smiju remetiti rad policijskih službenika niti na bilo koji način ugrožavati tok istrage koja se vodi.
- (5) Policijski službenik koji je zadužen za obezbjeđenje lica mjesta neće dozvoliti ulazak novinarima u prostor obilježen policijskom trakom, s tim da je novinarima dozvoljeno kretanje i fotografisanje izvan prostora obilježenog trakom.
- (6) Ukoliko tužilac rukovodi uviđajnim radnjama, postupat će se u skladu sa njegovim uputama, kada je u pitanju lice mjesta i pristup novinara, sa naznakom da ukoliko tužilac izda posebnu naredbu kojom zabranjuje bliži pristup novinara ili kojom istim omogućava neku radnju na licu mjesta mimo standardnih i opisanih procedura, potrebno je da se o tome sačini posebna službena zabilješka koja će sadržavati naznačene činjenice.

Član 14.

(Pristup medija mjestu policijskog uviđaja)

- (1) U određenim situacijama policijski službenici imaju pravo da kontrolišu pristup predstavnika medija, uključujući i fotografe područjima kao što su:
 - a) lokacije većih požara, prirodnih katastrofa ili drugih katastrofalnih događaja,
 - b) mjesto izvršenja krivičnog djela,
 - c) posjete visokih zvaničnika,
 - d) javne događaje koji zahtijevaju postavljanje obezbjeđenja i kontrolu masa,
 - e) druge situacije koje mogu ugroziti integritet istrage ili javne bezbjednosti.

(2) Predstavnici medija nemaju pravo da se miješaju u operativne aktivnosti policije u smislu provedbe zakona na mjestu događaja.

(3) Predstavnici medija su obavezni da postupaju u skladu sa naredbama policijskog službenika koji je zadužen za obezbjeđenje lica mjesta, a koje su izdate u skladu sa ovim pravilnikom.

Član 15.

(Davanje informacija medijima)

(1) U toku radnog vremena, službenici za odnose s javnošću odgovorni su za kontakt sa medijima i davanje informacija medijima.

(2) Izvan radnog vremena i tokom neradnih dana, osoba odgovorna za kontakt i davanje informacija medijima, osim službenika za odnose s javnošću, je dežurni policijski službenik Operativnog centra Uprave policije, uz saglasnost policijskog komesara ili službenika za odnose s javnošću.

(3) U posebnim situacijama, službenici za odnose s javnošću trebaju biti stalno dostupni predstavnicima medija i izvan radnog vremena, sve dok posebna situacija traje.

Član 16.

(Saradnja policije i tužilaštva)

Kako bi se postiglo blagovremeno i koordinirano informisanje javnosti o događajima koji mogu izazvati uznemirenost građana, kao i istragama koje se zajednički sprovode u saradnji sa tužilaštvom, službenici za odnose s javnošću postupaju na način utvrđen ovim Pravilnikom i u skladu sa uputama postupajućeg tužioca.

Član 17.

(Neovisnost pri javnom istupanju)

Javna istupanja Ministarstva i Uprave policije neovisna su o političkim događanjima i temama, ne sadrže komentare političkih izjava i odražavaju profesionalnu neovisnost Ministarstva i Uprave policije u odnosu prema političkim subjektima, zakonodavnoj, izvršnoj i sudskoj vlasti.

Član 18.

(Zahtjev za autorizaciju)

Osobe koje su dale izjavu u ime Ministarstva i Uprave policije imaju pravo od medija zahtijevati autorizaciju, odnosno potvrdu autentičnosti izjave, razgovora ili intervjua prije njihovog objavljivanja.

Član 19.

(Vrste javnih istupanja)

Javna istupanja u ime Ministarstva i Uprave policije mogu biti u obliku saopštenja za javnost, konferencija za novinare, razgovora sa predstavnicima medija, izjava za medije, reagovanja, zahtjeva za ispravkama i slično.

Član 20.

(Konferencije za novinare)

(1) Konferencije za novinare organizuju se u skladu sa potrebama Ministarstva odnosno Uprave policije.

(2) Povod za sazivanje konferencija za novinare jesu teme i događaji od posebne važnosti i interesa za rad Ministarstva odnosno Uprave policije te se realizuju kroz dogovor i koordiniranu aktivnost ministra, policijskog komesara i službenika za odnose s javnošću.

(3) Konferencije za novinare organizuju i pripremaju službenici za odnose s javnošću u saradnji sa rukovodiocima organizacionih jedinica na čiji rad se istupanje na konferenciji za novinare odnosi.

(4) Predstavnici medija moraju biti obaviješteni o mjestu i vremenu održavanja konferencije za novinare najmanje 24 sata prije njenog održavanja osim u posebnim situacijama kada ovaj rok može biti kraći.

Član 21.

(Saopštenja za javnost)

(1) Saopštenja za javnost pišu se i objavljuju prema potrebi Ministarstva odnosno Uprave policije.

(2) Povod za pisanje saopštenja za javnost jesu teme i događaji od posebne važnosti i interesa za rad Ministarstva odnosno Uprave policije, te za širu javnost.

Član 22.

(Praćenje medijskih objava)

(1) Ministarstvo i Uprava policije sačinjavaju listu medija za potrebe Ministarstva i Uprave policije koju redovno ažuriraju službenici za odnose s javnošću.

(2) Službenici za odnose s javnošću prate medijske objave o aktivnostima Ministarstva i Uprave policije, po potrebi pripremaju pravovremena reagovanja i ispravke te o medijskim objavama sačinjavaju godišnju analizu.

- (3) Ako bilo koji uposlenik Ministarstva odnosno Uprave policije primijeti ili dobije informaciju da su podaci o aktivnostima Ministarstva odnosno Uprave policije u medijima pogrešno navedeni ili protumačeni, neobjektivno prezentirani ili zloupotrijebljeni, o tome će obavijestiti nadležnog službenika za odnose s javnošću.

Član 23.

(Reagovanja na netačne i nepotpune informacije)

- (1) U slučajevima kada mediji objave netačnu ili nepotpunu informaciju, službenici za odnose s javnošću će medijima dostaviti sve potrebne podatke i zahtijevati njihovo objavljivanje, u cilju objektivnog informisanja javnosti.
- (2) Pravo na ispravku objavljene informacije ostvaruje se ako su objavljenom informacijom povrijeđena nečija prava i interesi, a svrha ispravke je ispravljanje netačne ili nepotpune informacije.
- (3) Pod pojmom ispravka podrazumijeva se, osim ispravki pogrešnih tvrdnji ili netačnih navoda u objavljenoj informaciji, i iznošenje činjenica i okolnosti kojima Ministarstvo odnosno Uprava policije pobija ili bitno dopunjuje navode u objavljenom tekstu.
- (4) U zahtjevu za ispravku predočavanjem dokazivih činjenica, poriče se neobjektivna prezentacija, neosnovana kritika, zloupotreba podataka ili pogrešno protumačene činjenice odnosno bitno se dopunjuju sporni navodi o indicijama, činjenicama i podacima u objavljenoj informaciji.

Član 24.

(Zahtjev za objavljivanje ispravke)

Ministar, policijski komesar ili službenik za odnose s javnošću ima pravo podnijeti zahtjev glavnom uredniku medija da besplatno objavi ispravku objavljene informacije, na istom mjestu programskog prostora i na isti način na koji je bila objavljena informacija na koju se ispravka odnosi.

Član 25.

(Propisi koji prestaju da važe)

Stupanjem na snagu ovog Pravilnika prestaje da važi Pravilnik o osnovnim standardnim procedurama policije pri javnim istupima i odnosima sa medijima broj 08-05-02-1-6280/02 od 06.01.2002. godine.

Član 26.

(Stupanje na snagu)

Ovaj pravilnik stupa na snagu osmog dana od dana objavljivanja na oglasnoj ploči Ministarstva i Uprave policije a isti će se objaviti u "Službenim novinama Zeničko-dobojskog kantona".

Broj: 08-01-02-1-4675/19
Datum: 09.09.2019. godine
Zenica

MINISTAR

Dario Pekić, s.r.

.....